



QUÆSTIO MEDICA,
 QUODLIBETARIIS DISPUTATIONIBUS
 MANE DISCUTIENDA
 IN SCHOLIS MEDICORUM.

Die Jovis octavâ Februarii.

M. ANTONIO LE MOINE,
 DOCTORE MEDICO,
 PRÆSIDE.

An aër internus præcipuum auditûs organum?

I.



Thomo rerum circumstantium naturam percipere, sicque noxias fugere, & convenientes prosequi posset, variis sensibus tanquam exploratoribus & custodibus donatus est. Illi pro diverso situ in internos & externos dividuntur. Externi quinque vulgò statuuntur, quorum duo sunt omnibus animalibus ad vivendum necessarii, tactus & gustus, tres alii olfactus, auditus, & visus, perfectioribus

A

tantum à naturâ concessi : non tamen acutiores , & sagaciores , perfectiori homini ; imò olfactus ejusmodi plus ipsi molestiarum pareret quam voluptatis & commodi. Primæ visui vulgò tribuuntur , auditus tamen in eo præstat , tum quod ejus ope , sapientia , ad quam homo natus , comparanda veniat , imò fides , & Dei notitia recipiatur , præstat etiam quod rerum intima percipiat , & ipsius humanæ mentis affectiones : cum visus non ultra corporum superficiem pervadat. Sæpiusque mentiatur & imponat. Tactus quidem per omne corpus diffusus est : sed alii quatuor in capite tanquam in speculâ collocati ; habent singuli organa propria , multis & variis ex partibus conflata , quarum una præcipuum est & immediatum sensationis organum , quæ vivens esse debet , & animata : in istis autem sensuum exteriorum organis ab objecto sensibili fit impressio , quæ nervorum , & spirituum in ipsis contentorum ope traducitur ad cerebrum , sensus interni sedem , ubi perficitur , quæ inchoata fuerat in organo privato , objecti perceptio , non tamen velut existens in cerebro , sed in eâ corporis parte quam objectum afficit , & in quâ suam imprimat actionem.

I I.

OBJECTUM auditûs sonus est ; qui , dum corpus sonorum percutitur , à compressis aëris partibus , elasticâ suâ vi resilientibus , seque restituere nitentibus , productus , in motu quodam tremulo & reciproco consistit : etenim collisum corpus totum in se tremat , ac minutis quibusdam undationibus succussionibusque concutitur , quas in vicinum aërem imprimit , hicque similiter proximum afficit , donec infinitis diadromis continuatione quâdam ad aures pervenerit. Nec credas aërem sono solum pervium esse , cum solida corpora sint ut plurimum ad tremorem concipiendum magis apta fluidis : itaqueque sunt ad sonum recipiendum aptiora. Hinc per longissimas trabes sonus momento propagatur ab unâ extremitate ad alteram , nihil adstantium strepitu prohibente : per ipsam quoque terram transvehi norunt excubitores , qui aure admotâ terræ , si hostis moveat , percipiunt. Atque id tremore fieri convincitur , ex cubo lusorio imposito membranæ tympani supra terram erecti , qui tremere & subsultare tunc animadvertitur : in omnem autem circumferentiam tremor iste diffunditur , eò fere modò , quò circuli in aquis , ab injectò lapillò sibi succedentes efformantur , posterioribus priores includentibus , & ut juxta fluxum aquarum majores fiunt & longiores : ita sonus longius secundò quam adversante ventò pro-

greditur, pari tamen velocitate. Atque ut si forte allidant illi circuli in ripam, aut durius aliquid, percutiuntur: ita pariter si undæ vocales in corpus solidum, ac præsertim si læve sit, & concavum, impingant, repelluntur, ac remeant in locum unde sonus oriebatur, & Echo gignitur, quæ, si multiplex ejusmodi corpus phonocampiticum, & valida prima fuerit impressio, multiplex quoque & polyphona fit Echo: ita ut decies, vicies, & tricies vox eadem in quibusdam locis fuerit repetita; hinc etiam quæ celebrantur à quibusdam historicis voces portentosæ, ludibundâ quâdam naturæ garulitate. Illam ars imitari contendit & perficere, sic aulas & ambulatoria construere novit, ut quidquid in illis dicatur, in certo puncto liceat audire: sic in palatiis principum cubicula disponere, ut ipsis omnes in aliis habiti sermones exhibeantur, statuas loquaces fabricare, atque etiam sic inter se conciliare sonos, ut dum concordiam discordi lenocinantur auribus, varios ac miros contrariosque pro sonorum varietate in audientium animis concitet affectus. Quod non in hominibus modò, sed in ipsis etiam brutis animantibus observatum. In morbis etiam non mediocriter valet harmonia, cum ischiaticos, melancholicos, furiosos, dæmoniacos, venenatos, & à Tarentulâ demorfos, fanatos esse, quin imò nullâ aliâ ratione istos curari posse proditum est. Quanta quanta sit sonorum efficacia, non tamen, quod habet historia sacra, Hiericuntinos muros, sono buccinarum clangoribusque tubarum, & Hæbræorum vociferatione naturaliter esse dejectos putes; nec si verbis prolatis morbi quidam sanentur, hanc vim verbis naturalem esse credas. Voces humanas in canalibus & tubis obsignatis servari posse: ut in plagis ad polum arcticum sitis hieme gelis à loquentis ore concrefcere, quibus vernò tempore solutis, omnia personare, omninò fabulosum.

I I I.

AUDITUS disciplinæ sensus in homine, qui disciplinæ capacissimus, exquisitus esse debuit, hinc ad ejus organum præter structuræ mirabilis artificium, magnam adhibuit natura partium multitudinem: quarum cum aliæ pateant oculis, & ad capitis latera promineant, aliæ vero sint intus reconditæ, duplex primo constitutum organum, externum scilicet, & internum. Illud quod vulgò sub auris externæ nomine venit, duabus constat, auriculâ scilicet & auditoriò meatu. Illa, quæ cartilagine crassâ construitur vestitâ cute tenui & subtili expansa est, & aliquantulum complanata, inæqualis, variis sulcis qui desinunt in cavitatem quamdam, concham dictam,

è quâ producitur meatus auditorius, osseus partim & cartilagineus, eâdem quâ auricula, pelle vestitus in quâ glandulæ, sudore in cerumen concrecente madidæ, ad eam terminatur membranam, quæ tympani dicta, firma, tenuis, & pellucida. Internum ergo & verum auditûs organum in ossis temporum petrosô processu insculptum est, locô adversus foris irruentia propter duritiem tutissimô, & ad sonum, propter siccitatem, aptissimô. In duas cavitates dividitur, quarum prima ponè illam tympani membranam, tympanum ipsa dicta, scabra est, inæqualis, anfractuosa, & ex multis veluti cavernulis & cuniculis conflata, tria continet auditûs ossicula à rudi quâdam similitudine, cum malleô, incude, & stapede similiter appellata, quibus, quartum orbiculare dictum, additur. Malleus antrosum collocatus longiore manubrii crure transversim adhæret membranæ tympani, quam intus retrahendo, cavam exterius efficit, caput autem habet per ginglymum annexum incudi. Hoc autem ossiculum duos habet processus, quorum major mediante orbiculari conjungitur cum stapede, cujus basis in ovalem fenestram inserta, eam exactè claudit. Tribus hæc ossicula musculus moventur, quorum duo, mallei sunt, tertius in stapedis caput inseritur, quartus additur à nonnullis, quem adhuc ad malleum pertinere volunt. Quæ colliguntur in hac cavitate excrementa, per aquæ ductum, qui osseus eâdemque membranâ, quâ tympanum vestitus, ad nasi fundum in extremitate palati, paulô supra uvulam terminatur, effundi possunt, & cum nulla sit in hoc canali valvula, aër ibi contentus, renovari. Duo sunt cavitatis tympani ostia seu fenestræ ex adverso membranæ tympani. Sublimior quæ & ovalis à basi stapedis clauditur, altera rotunda, habet in ossis medio incisuram, cui inserta est membrana tenuis sicca & pellucida. Per hæc fenestras transitus fit ab hac cavitate ad alteram, quæ propter varios gyros, & anfractus labyrinthus appellatur, ac potissimum ubi tres canales in semicirculos inflexi: ubi vero quinque patent istorum canalium ostiola (uno nempe duobus communi) vestibulum labyrinthi dicitur. Ubi denique ad vestibuli latus istis canalibus oppositum, versus faciem, ductus bifariâ tenui durâ, & friabili laminâ secundum longitudinem divisus, initiô latior sensim angustatur, & per duos cum dimidio circulos contorquetur in spiræ modum, cochlea nuncupatur,

I V.

PARTIUM quæ ad auris constructionem concurrunt, aliæ sonis excipiendis, colligendis aliæ, aliæ transmittendis ad præ-

cipuum organum, omnes fere ut fortior impressio sit, multiplican-
 dis inserviunt. Ac primum quidem auricula patens in vanni mo-
 dum extensa, multum aëris excipit, suis inæqualitatibus reflectit,
 sulco deducit, in conchâ colligit, ex quâ meatum auditorium ille
 subiens, ubi adhuc propter obliquitatem reflectitur, tandem ad
 tympani membranam allabitur, cui motum motûsque characterem
 à sonoro corpore productum imprimit. Ut autem uveæ foramen
 pro majori vel minori luminis appulsu constringitur aut dilatatur.
 Ita quoque hæc membrana pro sonorum varietate magis aut minus
 ope mallei, qui suis ad id musculis movetur, tenditur, atque sic
 ista meninx ad sonum allabentem accomodata, quem habet ab ex-
 teriori aëre motum, transmittit in suæ cavitatis aërem, & in ossi-
 cula: movet quidem primo malleolum, hic incudem, incus stape-
 dem: aër vero membranam fenestræ rotundæ, quæ aërem cavitatis
 alterius similiter afficit. Ast ubi fortior impressio, stapes ovale
 foramen aperiens, facilem aditum sono præbet. Neque enim fora-
 men illud in osse tam duro excavatum à naturâ, ut à basi stapedis
 ipsi tenaciter affixâ, semper obturatum maneret. Neque musculus
 in illius officuli caput insertus, ut alium non habeat motum, quam
 eum, quem à malleo per incudem accipit. Quemadmodum in oculo
 crystallinus humor, pro rei visibilis conditione, & distantia, modò
 in convexiorem superficiem sese contrahit, unde tantulum accedit
 retina, modò in magis planam sese explicat, unde hujus tunicæ
 tantulus recessus; ita pes stapedis incubans ovali foramini, illud
 modò plus, modò minus, modò totaliter aperiendo, prout varius
 soni modus exigit, idem ad illud ovale foramen præstare videtur,
 ac tibicinis digiti, dum fistulâ personat, in ejusdem fistulæ foramini-
 bus; atque idcirco porosam, spongiosam, levissimamque substan-
 tiam obtinuit, cum malleus & incus compactam, ac solidissimam
 habeant, ut posset facilius à suo foramine extrahi, attolli, depri-
 mi, & ad ipsum diversimodè, pro diversâ soni ratione moveri: ad
 hunc etiam fortasse juvandum motum data est membrana, quæ inane
 dictum, triangulum vestit, non enim potest ad aëris circumfusi motum,
 illa non moveri, & suum officulo motum non imprimere. Sic ita-
 que transmissus sonus statim diffunditur in labyrinthum & co-
 chleam, illic per sex ostia patentia tubos semicirculares ingressus
 ex oppositis singulis, (quasi sex tubas percurrisset,) multo quam
 ante fortior egreditur. Hic cum tubi cochleati tantum præstent in
 sonis, ac in iis quæ visu percipiuntur, optici, dum per circuitus spi-

rales sensim se coarctantes diffunduntur radii sonori, post multas reflectiones velut in puncto colliguntur, & sonum intentiorem ac vehementiorem efficiunt.

V.

CUM nullum in naturâ vacuum sit, & etiam si extaret, sonus in eo non produceretur, certum est hanc utramque cavitatem aëre repleti, quem ingenitum & vernaculum veteres, *implantum*, & *inædificatum* barbari dixerunt: alterius tamen naturæ non est, ac externus quem respirando ducimus. At cum iste vitæ sit penitus expers, nec aliis ad auditum usibus aptus esse possit, quam ut species sonoras deferat, internum quoque, nec vitæ participem esse, nec inter partes corporis collocandum, neque aliud ad auditum præstare; atque ideo cum idem medium & sensorium esse nequeat sensorii munus exercere non posse, necesse est. Quod alterius naturæ non sit, demonstrat necessaria semper aëris insiti renovatio. Is enim in istis cavitatibus conclusus, non potest per tot annorum feriem ibi permanere, quin multum alteretur, & cum perpetuus sit in nostro corpore substantiarum etiam solidarum effluxus, quin ista quæ tenuis est, & aërea perpetuò dissipetur, & absumatur atque etiam perpetuò reparetur: hæc autem reparatio fit ab aëre elementari nobis circumfusò, qui per aquæ ductum facile subit cavitatem tympani, & ab istâ transit in alteram per foramen ovale. Cum totum corpus confluxile sit, & conspirabile, immiscentur etiam vapores; quos exhalant arteriæ per hæc antra discurrentes. An igitur tanta debet esse objectum inter & organum convenientia, ut quoniam sonus per aërem diffunditur, & visu percipi nequit, præcipuum etiam, quo percipiatur, organum aëreum esse debeat, & oculorum aciem fugere? An ad aliquid inane, extraneum aut excrementitium recurrendum, ut ei tam præstantis sensationis officium assignetur, cum tot sint in organo totali partes, artificio tam mirabili constructæ, quæ huic usui possunt infervire, tot inquam ut non unicum, sed triplex à quibusdam statuatur organum auditûs immediatum, vestibulum scilicet labyrinthus & cochlea, pro triplici nervi mollioris auditorii furculò, per istas partes diffusò. Nulla tamen ad id magis apta pars videtur, quam cochleæ præcipua lamina, nempe spiralis, quæ cum dura sit, fragilis, tenuis, sicca, insigni vi pollens elastica, facile vibrationis motum potest excipere, eoque facilius quò, cum suspensa sit circa cochleæ medium, utrinque verberatur, & duplicem eodem tempore impressionem ab

aëre superiori & inferiori patitur, facileque potest, cum tota ramulis nerveis intertexta sit, cum nervis & cerebro communicare. Sed quoniam in avibus, & piscibus qui auditu non carent, cochlea non reperitur, hujus officium labyrintho demandatur in istis animalibus. Plura quidem inquirere esset variis difficultatibus implicari, & quasi labyrinthum ingredi, cum non levis sit labor, in-
tus quomodo fiat auditio, definire. Adeo namque reconditum & obscurum est hoc antrum, ut nunquam clarius quàm in tenebris se manifestet sonus, & si qua lux intromittatur, ille statim evanescat. Satis tamen evidenter patet aërem internum replendis istis cavitatibus, & ad auditum transmittendis sonis tanquam medium, eorumque vehiculum tantum inservire.

Non ergo aër internus præcipuum auditus organum;

Domini Doctores disputaturi.

M. Carolus Thuillier.

M. Nicolaus Andry,
Professor Regius.

M. Franciscus Maillard.

M. Jacobus Souhait.

M. Claudius du Fresno.

M. Joannes Peiffon, Medi-
cus Regis ordinarius.

M. Carolus Bompert.

M. Antonius le Clerc,
Pharmacia Chymica
galenica Professor.

M. Petrus Paulus Guyart,
Regii Mutilatorum noso-
comii Medicus ordinarius.

Proponebat Parisiis JOANNES HERMENT, Parisinus,
Medicus Regis ordinarius utriusque aulae Equestris designatus,
& Baccalaureus Medicus. A. R. S. H. 1703.

Apud Viduam Francisci Muguet, Regis & Facultatis Medicinæ Typographi.